



Broj/Број: 03/1-50-1-9-24/08
Sarajevo/Сарајево, 29.06.2008.godine

Z A P I S N I K

**24. sjednice Zajedničke komisije za odbranu i sigurnost BiH
Parlamentarne skupštine BiH,
održane 23. 7. 2008. u vremenu od 11 do 12 sati,
u nastavku 24. 7. 2008., u vremenu od 12,15 do 13,45 sati,
i nastavku 29. 7. 2008., u vremenu od 9,45 do 10 sati**

Sjednica Zajedničke komisije za odbranu i sigurnost održana je u tri dijela. Prvi dio sjednice održan je 23. 7. 2008. od 11 do 12 sati, prvi nastavak održan je 24. 7. u vremenu od 12,15 do 13,45 sati, dok je drugi nastavak održan 29. 7. 2008. od 9,45 do 10 sati.

Prvom dijelu sjednice prisustvovali su članovi Zajedničke komisije: Branko Zrno, Jozo Križanović, Hazim Rančić, Dušanka Majkić, Ivo Miro Jović, Vinko Zorić i Adem Huskić.

Odsustvo s prvog dijela sjednice opravdali su: Šefik Džaferović, Slobodan Šaraba, Mirko Okolić, Drago Kalabić i Sulejman Tihić.

Sjednici su prisustvovali i gosti, kao i predstavnici Sekretarijata Parlamentarne skupštine BiH:

- Tarik Sadović, ministar sigurnosti BiH,
- Ranko Ninković, Predsjedništvo BiH,
- Zoran Jovanović, Vijeće ministara BiH,
- Muhamed Smajić, Ministarstvo odbrane BiH,
- Vesna Pavičić, Ministarstvo sigurnosti BiH,
- Nijaz Čardaklija, Ministarstvo vanjskih poslova BiH,
- Dragiša Mekić, Ministarstvo vanjske trgovine i ekonomskih odnosa BiH,
- Maja Ribar, OHR,
- Urlich Heider, Christian Haupt, Jasna Dragičević i Malik Tanović, Misija OSCE-a u BiH,
- Anibal Villalba, Snežana Golijanin, Natalie Bergmann i Jasmin Porobić, EUFOR,
- Lejla Hadžihasanović, Štab NATO-a u BiH,
- Dragica Hinić, sekretar Zajedničke komisije za odbranu i sigurnost BiH, i Jovica Katić, stručni saradnik u Zajedničkoj komisiji.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH.

Branko Zrno upoznao je prisutne da su svi članovi u dodatnim materijalima dobili Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.9.2007. do 29.2.2008., koji je u ime predlagača dostavilo Ministarstvo vanjskih poslova BiH, te predložio da dnevni red sjednice bude dopunjen razmatranjem ovog izvještaja, koji bi se razmatrao kao 5. tačka. Također, upoznao je prisutne da je nastavak ranije prekinute 19. sjednice Doma naroda zakazan istog dana kada se održava i sjednica

Komisije, u 12 sati, te da će, prema tome, Zajednička komisija raditi do početka sjednice Doma naroda i potom morati prekinuti sjednicu. Nastavak sjednice bio bi održan dan kasnije, 25.7.2008., nakon završetka već zakazane 25. sjednice Zajedničke komisije. Potom je otvorio raspravu o dnevnom redu.

Članovi Komisije jednoglasno su usvojili prijedlog izmjena dnevnog reda koje je predložio Branko Zrno, te je konstatirano da 24. sjednica Zajedničke komisije ima sljedeći

DNEVNI RED

1. Usvajanje Zapisnika 23. sjednice Zajedničke komisije;
2. Razmatranje Prijedloga zakona o kontroli kretanja oružja i vojne opreme, prva komisijska faza (predlagač: Vijeće ministara BiH);
3. Razmatranje Prijedloga zakona o graničnoj kontroli, prva komisijska faza (predlagač: Vijeće ministara BiH);
4. Razmatranje Odluke o učešću jedinice Oružanih snaga BiH u operaciji podrške miru „Iračka sloboda“ u Iraku (podnosilac: Predsjedništvo BiH);
5. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.9.2007. do 29.2.2008. (podnosilac: Ministarstvo vanjskih poslova BiH);
6. Prijedlog autentičnog tumačenja člana 185. stav 1. Zakona o službi u Oružanim snagama BiH (podnosilac: Ministarstvo odbrane BiH);
7. Informacija o izdatim dozvolama za promet oružja, vojne opreme i proizvoda dvojne namjene (podnosilac: Ministarstvo vanjske trgovine i ekonomskih odnosa BiH);
8. Tekuća pitanja:
 - a) Poziv PSOTC-a za učešće na regionalnom seminaru o upravljanju kriznim situacijama, od 7. do 10. 10. 2008., Ilidža;
 - b) Informacija o sastanku članova Zajedničke komisije s komandantom EUFOR-a u BiH general-majorom Martinom Villalainom;
 - c) Informacija o sastanku s predstavnicima Antikorupcionog tima NATO-a;
 - d) Informacija o sastanku NATO Koordinacionog tima Vijeća ministara BiH;
 - e) Informacija o posjeti članova Zajedničke komisije za odbranu i sigurnost BiH Iraku.

Ad. 1. Usvajanje Zapisnika 23. sjednice Zajedničke komisije

Komisija je, bez rasprave, jednoglasno usvojila Zapisnik 23. sjednice Zajedničke komisije.

Ad. 2. Razmatranje Prijedloga zakona o kontroli kretanja oružja i vojne opreme, prva komisijska faza (predlagač: Vijeće ministara BiH)

Branko Zrno naveo je da je, u skladu sa zaključkom s prethodne sjednice Komisije, Ministarstvo sigurnosti BiH Zajedničkoj komisiji dostavilo, 16. 7. 2008., usaglašeni prijedlog amandmana na ovaj zakon. Istakao je također da su članovi Komisije dan prije sjednice dobili i dopis EUFOR-a, a u čijem prilogu je dato 13 amandmana na prijedlog ovog zakona, koji su usaglasile međunarodne institucije u BiH: EUFOR, OHR, OSCE i UNDP. Potom je dao riječ predlagaču Zakona.

Tarik Sadović, ministar sigurnosti BiH, zahvalio se svima koji su učestvovali u pokušajima da se sačine amandmani kojima bi se poboljšao prvobitni tekst Prijedloga zakona, te naveo da Ministarstvo sigurnosti BiH nije dobilo dopis od međunarodnih organizacija koji je podijeljen članovima Komisije. Naveo je da je Ministarstvo sigurnosti BiH, u skladu sa zaključkom Komisije s protekle sjednice, njenim članovima dostavilo usaglašeni prijedlog amandmana na ovaj zakon, u kojima podržava one amandmane koje je sačinila Radna grupa s predstavnicima Ministarstva unutrašnjih poslova RS-a, 26. 6. 2008., uz napomenu da se to ne odnosi na amandmane II., III., IV. i V. Također je naveo da Ministarstvo ne podržava amandmane X., XI. i XII., te da u tom dijelu ostaje pri prvobitnim odredbama teksta Zakona. Naveo je i to da Ministarstvo podržava amandman XIII. na član 20. Zakona, i to u dijelu koji se odnosi na stavove 1. i 2., a koji su vezani za donošenje propisa, odnosno liste naoružanja uz prethodnu saglasnost entitetskih ministarstava unutrašnjih

poslova i Policije Brčko Distrikta BiH, te da ostali dio ovog amandmana ne podržavaju. Prijedlogom koji je uputilo Komisiji, Ministarstvo je željelo ovo pitanje riješiti na korektan način i na zadovoljstvo svih učesnika u kreiranju ovog prijedloga zakona, a konačna odluka o sudbini Zakona svakako je u rukama članova Zajedničke komisije.

Dušanka Majkić navela je da je do sada bilo nekoliko pokušaja usaglašavanja teksta ovog zakona, koji su na kraju neuspješno završili. Istakla je da ima stav Ministarstva unutrašnjih poslova Republike Srpske kojim su apsolutno neprihvatljivi amandmani 1, 2, 3, 4, 7, 8, 9, 10, 11, 12 i 13, da su problematični amandmani 6 i 10, koji se odose na članove 10. i 19., te navela da, ukoliko se ne mogu usaglasiti ova dva posljednja amandmana, nema nikakvog osnova da glasa za usvajanje Zakona.

Adem Huskić rekao je da je Komisija prerano počela pričati o amandmanima, jer nisu usvojeni ni principi Zakona, te sugerirao članovima Komisije da se vrate raspravi o principima.

Ivo Miro Jović izrazio je nezadovoljstvo činjenicom da su članovi Komisije tek jučer dobili prijedloge izmjena i dopuna Zakona u formi amandmana od međunarodne zajednice u BiH. Njima je međunarodna zajednica potpuno ignorirala činjenicu da MUP-ovi postoje i u svim kantonima unutar Federacije BiH, dok je u Zakonu naveden Brčko Distrikt BiH, koji nema svoje ministarstvo unutrašnjih poslova. Naglasio je da je nedopustivo prenositi nadležnost s kantona na entitet bez saglasnosti samih kantona, te hrvatskog naroda unutar njih. Prijedlog zakona ocijenio je neprihvatljivim jer se u izvornom tekstu prepoznaju nadležna ministarstva, a ovim putem bi se ovlastilo jedno tijelo koje je neustavno.

Jozo Križanović saglasio se s konstatacijom Adema Huskića da ovo nije amandmanska faza, već da treba govoriti o principima Zakona. Naglasio je da ga malo zbunjuje stav Dušanke Majkić u kojem ona govori o stavu MUP-a RS-a, te da neće prihvatiti Zakon ukoliko Komisija ne prihvati navedene amandmane. Stoga je predložio Komisiji da se, zbog stava SNSD-a i MUP-a RS-a, izjašnjavanje o principima ovog zakona ostavi za naredni dan, kako bi se pokušali približiti njihovi i stavovi nadležnog ministarstva.

Vinko Zorić podržao je prijedlog Jozice Križanovića, navodeći da je nemoguće usvojiti Zakon bez saglasnosti predstavnika iz RS-a. Predložio je da, ukoliko se postojeća situacija ne može razriješiti, Zakon sa svim amandmanima bude upućen Ministarstvu sigurnosti BiH, kako bi ono na osnovu njih izradilo novi tekst Prijedloga zakona.

Dušanka Majkić navela je da principi ovog zakona direktno zadiru u njegovu suštinu, te ga zato neće podržati u prvobitnoj verziji, niti će podržati izmjene koje je ministar sigurnosti BiH prezentirao. Kao dobar osnov za prihvatanje, navela je prijedlog predstavnika međunarodne zajednice u BiH, te podržala prijedlog da se do sutra pokušaju usaglasiti stavovi o ovom zakonu.

Branko Zrno potom je dao na glasanje prijedlog Jozice Križanovića da se izjašnjavanje o principima Zakona prolongira za naredni dan, kako bi se u međuvremenu pokušali približiti stavovi predstavnika iz RS-a, međunarodne zajednice u BiH i Ministarstva sigurnosti BiH.

Članovi Komisije potom su jednoglasno, sa sedam glasova „za“, prihvatili ovaj prijedlog.

Nakon realiziranja ove tačke dnevnog reda, Branko Zrno zaključio je prvi dio sjednice i njen nastavak zakazao za sutra.

Prvom nastavku sjednice, 24.7.2008., prisusvovali su članovi Zajedničke komisije: Branko Zrno, Šefik Džaferović, Jozo Križanović, Hazim Rančić, Dušanka Majkić, Ivo Miro Jović, Vinko Zorić i Adem Huskić.

Odsustvo s drugog dijela sjednice opravdali su: Slobodan Šaraba, Mirko Okolić, Drago Kalabić i Sulejman Tihić.

Sjednici su prisustvovali i gosti, kao i predstavnici Sekretarijata Parlamentarne skupštine BiH:

- Tarik Sadović, ministar sigurnosti BiH,
- Ranko Ninković, Predsjedništvo BiH,
- Zoran Jovanović, Vijeće ministara BiH,
- Muhamed Smajić, Ministarstvo odbrane BiH,
- Vesna Pavičić i Dragan Slipac, Ministarstvo sigurnosti BiH,
- Nijaz Čardaklija, Ministarstvo vanjskih poslova BiH,

- Velibor Lučić, Ministarstvo vanjske trgovine i ekonomskih odnosa BiH,
- Maja Ribar, OHR,
- Christian Haupt i Jasna Dragičević, Misija OSCE-a u BiH,
- Anibal Villalba, Snežana Golijanin, Natalie Bergmann, i Jasmin Porobić, EUFOR,
- Lejla Dizdarević, Štab NATO-a u Sarajevu,
- Mirsad Žiga i Amel Fako, Ambasada SAD-a,
- Dragica Hinić, sekretar Zajedničke komisije za odbranu i sigurnost BiH, i Jovica Katić, stručni saradnik u Zajedničkoj komisiji za odbranu i sigurnost BiH.

Na početku nastavka sjednice **Branko Zrno** podsjetio je da je Komisija tokom jučerašnjeg dana obavila raspravu o Prijedlogu zakona o kontroli kretanja oružja i vojne opreme, te da je za danas ostavila izjašnjavanje o principima Prijedlogu zakona, uz zaključak kojim su se do glasanja trebali pokušati usaglasiti stavovi članova Komisije sa stavovima međunarodne zajednice i Ministarstva sigurnosti BiH. Naglasio je da, prema dosadašnjem stanju, Zakon ne bi bio usvojen zbog neslaganja predstavnika iz RS-a s pojedinim njegovim odredbama, te istakao još jednom da se raspravlja i odlučuje samo o principima Zakona. Zaključio je da su uz Zakon dostavljeni u međuvremenu i amandmani Ministarstva sigurnosti BiH kao i amandmani predstavnika međunarodne zajednice u BiH, te da se oni mogu razmatrati kasnije tokom naredne komisijske faze. Sugerirao je potom članovima Komisije da podrže principe ovog zakona.

Jozo Križanović saglasio se da bi se trebalo razgovarati o principima Zakona, čija je suština prijenos nadležnosti sa EUFOR-a na domaće organe vlasti. Osnovni princip je da se prijenosom te nadležnosti ne narušava sigurnost prometa oružja i vojne opreme u BiH. Kako amandmani nisu predmet rasprave na današnjoj sjednici, on je naveo da može podržati Prijedlog zakona u ovoj fazi.

Šefik Džaferović rekao je da nema nepoznanica kada je u pitanju ovaj zakon. Iako je uloženo dosta truda do sada, ponovo postoji situacija da bi mišljenje o principima ovog zakona moglo biti negativno. U pokušaju da se napravi prihvatljiv tekst, održavali su se sastanci Radne grupe koja je radila na izradi Zakona, a članovima Komisije pismo su uputile četiri međunarodne institucije u BiH s konkretnim prijedlozima šta bi trebalo izmijeniti u zakonu. Stoga je naveo da Komisija nema drugog načina osim da glasa o Prijedlogu zakona u prvom čitanju, te predložio da se podrže principi a u mišljenju navede da je Zajednička komisija, u nastojanjima da dođe do prihvatljivog teksta Zakona, od domaćih i međunarodnih institucija u BiH dobijala dopise s konkretnim primjedbama na tekst zakona, te da će stoga svoj konačan stav o Prijedlogu zakona zauzeti u drugoj komisijakoj fazi. Na taj način bi Parlament, kroz mišljenje Zajedničke komisije, bio upoznat sa svim detaljima vezanim za ovaj zakon i bila bi data mogućnost da on ostane u proceduri.

Dušanka Majkić navela je da međunarodna zajednica u BiH svojim amandmanima pokušava popraviti postojeći tekst Zakona, jer ga u protivnom neće prihvatiti predstavnici iz Republike Srpske. Ona je istakla da ne može prihvatiti prijedlog Džaferovića jer nema kompetencije za to i da se nalazi u jako delikatnoj situaciji. Rekla je i da se nadala da će Ministarstvo sigurnosti BiH u posljednja 24 sata nešto napraviti, u skladu s raspravom koja je vođena tokom jučerašnje rasprave na sjednici, te zaključila da se, ukoliko Ministarstvo pak nije donijelo nikakav novi prijedlog kojim bi se prevazišla ova situacija, može preći odmah na glasanje o principima.

Adem Huskić zaključio je da ovdje postoji niz kontroverzi, te da je očigledno da s ovakvim omjerom glasova Zakon neće dobiti potrebnu većinu za usvajanje. Problemi su nastali čim je Vijeće ministara BiH dostavilo Zakon u parlamentarnu proceduru. Istakao je da ne može ići ispod ovih prijedloga koji su predloženi do sada, te predložio Komisiji da se u svakom slučaju glasa o Zakonu.

Tarik Sadović je kao dodatnu informaciju na dosadašnju raspravu naveo još činjenicu da su u izradi Prijedloga ovog zakona učestvovali i predstavnici međunarodne zajednice u BiH.

Odlučivanje u prvoj komisijskoj fazi

„Za“ usvajanje principa Prijedloga zakona glasalo je šest članova Komisije, jedan je bio „protiv“, a „suzdržanih“ nije bilo. Kako je utvrđeno postojanje proste većine, ali nepostojanje potrebnih glasova „za“ usvajanje predstavnika srpskog naroda, konstatirano je da Zajednička komisija nije prihvatila principe Prijedloga zakona o kontroli kretanja oružja i vojne opreme. Kao razlog

odbijanja navedeno je da se ovim zakonom vrši prijenos nadležnosti s entitetskog na državni nivo, a da za to ne postoji potrebna entitetska saglasnost.

Ad. 3. Razmatranje Prijedloga zakona o graničnoj kontroli, prva komisijska faza (predlagač: Vijeće ministara BiH)

Branko Zrno naveo je da se i u slučaju ovog zakona Komisija također izjašnjava o njegovim principima. Informirao je prisutne da je Komisija, na tragu zaključaka s protekle sjedice, dobila amandmane od Ministarstva sigurnosti BiH koji su usaglašeni s primjedbama koje je na Prijedlog zakona dostavio Ženevski centar za demokratsku kontrolu oružanih snaga (DCAF). Potom je otvorio raspravu o ovom zakonu.

Šefik Džaferović istakao je da postoji dopis Ministarstva sigurnosti BiH koji putem amandmana odražava rezultat razgovora koji su vođeni sa DCAF-om i u skladu je sa zahtjevom Komisije da se urade imjene Zakona. Predložio je da Komisija podrži principe Zakona, te da se pri tome obaveže da će u drugoj fazi ugraditi amandmane koje je dostavilo Ministarstvo sigurnosti BiH.

Dušanka Majkić smatra nerealnim prijedlog Džaferovića, navodeći da je nemoguće mijenjati Zakon na koji se predlaže približno isti broj amandmana kao što sam Zakon ima članova.

Šefik Džaferović odgovorio je na prethodno date primjedbe objašnjavajući da je ovakvo rješenje predložio s ciljem da BiH konačno dobije Zakon o graničnoj kontroli. Naveo je da se Komisija na tom putu sve vrijeme trudila da postigne dogovor između DCAF-a i Ministarstva sigurnosti BiH i da sada, kada je na pragu tog dogovora, pokušava da se odustane od toga.

Dušanka Majkić potom je odgovorila da, ako nam svako ministarstvo bude dostavljalo ovakve amandmane, kao što je to konkretno slučaj s Ministarstvom sigurnosti BiH, onda usaglašavanje uopće nije potrebno. Navela je da ona nema nijedan argument za prihvatanje ovakvog zakona jer nije sigurna da su u njega ugrađene i sve primjedbe koje je dostavio DCAF, te stoga treba sačiniti novi Prijedlog zakona, koji će u sebe uključivati sve ove primjedbe.

Adem Huskić naveo je da nije prvi put da neki zakon ne bude usvojen u prvoj komisijskoj fazi.

Vinko Zorić istakao je poslovničku mogućnost da Vijeće ministara BiH povuče ovaj zakon iz procedure i dostavi novi prijedlog, navodeći da se to moglo i ranije uraditi. Istakao je i razumijevanje za želju Džaferovića za usvajanjem Zakona jer i on želi da ovaj zakon prođe, ali je očito da ne postoje određeni uslovi za to.

Tarik Sadović naveo je da je Prijedlog zakona urađen u saradnji s međunarodnim stručnjacima, u prvom redu ekspertima iz Litvanije, koji su bili u Bosni i Hercegovini. Nakon izrade tog teksta DCAF je dostavio svoje primjedbe, od kojih su mnoge bile tehničke prirode. Zajednička komisija utvrdila je obavezu Ministarstva sigurnosti BiH da, zajedno s predstavnicima DCAF-a, usaglasi te primjedbe, što su oni i učinili i sada se pred Komisijom nalazi u potpunosti usaglašeni tekst. Istakao je da nema ovlaštenje za povlačenje Zakona iz procedure. Ovaj zakon predstavlja važan segment Sporazuma o stabilizaciji i pridruživanju i Sporazuma o liberalizaciji viznog režima. Zaključio je da je Ministarstvo ovim prijedlozima amandmana nastojalo pokazati dobru volju da se sva sporna pitanja usaglase.

Branko Zrno potvrdio je da će se Komisija izjasniti o principima, s tim što Vijeće ministara BiH može povući Zakon dok se on nalazi u prvoj fazi, doraditi ga i ponovo vratiti Komisiji na usvajanje. Također je naveo da, ukoliko Zakon ne bude usvojen u prvoj fazi, na njegovo ponovno upućivanje u parlamentarnu proceduru treba čekati šest mjeseci.

Šefik Džaferović zatražio je od predsjedavajućeg da na glasanje prvo stavi njegov prijedlog zaključka kojim Komisija podržava principe Zakona, s tim da se pri tome obaveže da će u drugoj fazi ugraditi amandmane koje je dostavilo Ministarstvo sigurnosti BiH.

Komisija, sa šest glasova „za“, jednim „protiv“ i jednim „suzdržanim“ glasom, uz postojanje proste većine, ali uz nepostojanje glasova „za“ predstavnika srpskog naroda, nije prihvatila prijedlog zaključka Šefika Džaferovića.

Odlučivanje u prvoj komisijskoj fazi

„Za“ usvajanje principa Prijedloga zakona glasalo je sedam članova Komisije, jedan je bio „protiv“, bez „suzdržanih“ glasova. Kako je utvrđeno postojanje proste većine, ali nepostojanje glasova „za“ prihvatanje predstavnika srpskog naroda, konstatirano je da Zajednička komisija nije prihvatila principe Prijedloga zakona o graničnoj kontroli. Kao razlog odbijanja navedeno je da se ovim zakonom vrši prijenos nadležnosti s entitetskog na državni nivo, a da za to ne postoji potrebna entitetska saglasnost, te da je na prijedlog dostavljen izuzetno veliki broj izmjena članova, radi čega bi bilo neophodno pristupiti izradi novog teksta zakona.

Ad. 4. Razmatranje Odluke o učešću jedinice Oružanih snaga BiH u operaciji podrške miru „Iračka sloboda“ u Iraku (podnosilac: Predsjedništvo BiH)

Branko Zrno dao je uvodne napomene u vezi s Odlukom Predsjedništva BiH o učešću jedinice Oružanih snaga BiH u operaciji podrške miru „Iračka sloboda“ u Iraku. Kako se niko od članova Komisije nije javio za raspravu, Zrno je Odluku dao na glasanje.

„Za“ Odluku glasalo je sedam članova Komisije, niko nije glasao „protiv“, dok je jedan član Komisije bio „suzdržan“. Kako je utvrđeno da postoji prosta većina, ali da ne postoje potrebni glasovi „za“ prihvatanje predstavnika srpskog naroda, konstatirano je da Zajednička komisija nije prihvatila ovu odluku.

Šefik Džaferović izrazio je sumnju u rezultate glasanja, te insistirao da se glasanje o ovoj odluci ponovi, ali da se prije toga o njoj provede rasprava, koja nije vođena prije prvobitnog glasanja, jer smatra da ova odluka koju je donijelo Predsjedništvo BiH ima posebnu težinu. Stoga smatra da je treba potvrditi.

Dušanka Majkić navela je da je mislila da će o ovoj odluci najviše govoriti članovi Komisije koji su nedavno bili u Iraku. Istakla je da je njeno glasanje rezultat onoga što je čula od kolege Slobodana Šarabe, koji je bio jedan od njih, a to je činjenica da koalicijske snage u Iraku vode pravi rat. S druge strane, na njenu odluku uticao je i nedavni intervju s generalom Sifetom Podžićem, koji je za jedne novine naveo da vojnicima koji idu u ratnu zonu u Irak niko ne može garantirati sigurnost. Kao sljedeći razlog navela je da se s obližnjih izvora tankerima izvlači nafta, čije cijene su nerealne svuda osim u SAD-u. Stoga je zaključila da je njena odluka lična, izazvana moralnom dilemom, jer ona kao čovjek ne bi nikada svoje dijete poslala tamo, pa ne želi učestvovati ni u slanju drugih ljudi.

Adem Huskić istakao je da ova odluka nije dostavljena tek tako, nego da je nju donio najviši organ vlasti u BiH, te da je stoga Parlamentarna skupština BiH, a prije svih ova komisija mora potvrditi, jer je ona u interesu Bosne i Hercegovine.

Hazim Rančić naveo je da je on, pored Slobodana Šarabe, bio drugi član Komisije koji je nedavno bio u posjeti Iraku, te je odgovorio Dušanki Majkić da će se Informacija o ovoj posjeti razmatrati u okviru tekućih pitanja, gdje će dati detaljna pojašnjenja o tamošnjim dešavanjima. Rekao je da ne zna odakle kolegici informacija o izvlačenju naftne i njenim cijenama, ističući da oni tokom svoje posjete te tankere nisu uopće vidjeli.

Šefik Džaferović predložio je zaključak da se Komisija o ovoj tački dnevnog reda ne izjašnjava na današnjoj sjednici, već da se glasanje odgodi za 29. 8. 2008., 15 minuta prije održavanja sjednice Predstavničkog doma, kada bi Zajednička komisija za odbranu i sigurnost bila u punom sastavu.

Zaključak Šefika Džaferovića Komisija je prihvatila jednoglasno, sa osam glasova „za“.

Ad. 5. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.9.2007. do 29.2.2008. (podnosilac: Ministarstvo vanjskih poslova BiH)

Branko Zrno predložio je da se ovaj izvještaj skine s dnevnog reda ove sjednice, s obzirom da je odgođeno i izjašnjavanje o Odluci iz prethodne tačke, te istakao da se ovaj izvještaj svakako neće razmatrati na narednoj sjednici Predstavničkog doma. Zato je sugerirao da se njegovo razmatranje odgodi za narednu sjednicu Komisije.

Članovi Zajedničke komisije jednoglasno su, sa osam glasova „za“, prihvatili prijedlog Branka Zrne.

Ad. 6. Prijedlog autentičnog tumačenja člana 185. stav 1. Zakona o službi u Oružanim snagama BiH (podnosilac: Ministarstvo odbrane BiH)

Branko Zrno informirao je prisutne da je Komisija posljednji put vrlo detaljno raspravljalo o ovom pitanju, te dao riječ podnosiocu zahtjeva za autentično tumačenje.

Muhamed Smajić iz Ministarstva odbrane BiH naveo je da je Ministarstvo odbrane BiH formiralo posebnu radnu grupu koja je sačinila dopis vezan za ovo autentično tumačenje, a u kojem je zauzela stav u skladu sa smjernicama Zajedničke komisije za odbranu i sigurnost. Naknadnom, ponovnom analizom teksta Zakona o službi u OSBiH, došlo se do jedinstvenog mišljenja u vezi s tumačenjem člana 185. stav (1)., a ono pretpostavlja da pravo na staž s uvećanim trajanjem imaju svi vojni osiguranici, odnosno profesionalna vojna lica na službi u OSBiH. Ovo mišljenje podrazumijeva da će doći do potrebe za rebalansom budžeta institucija BiH, jer će troškovi po ovom osnovu biti veći za 6,5 miliona KM, a koje Ministarstvo odbrane BiH u ovoj godini nije planiralo.

Šefik Džaferović mišljenja je da su vojna lica u zavisnosti kojem su entitetu pripadali, u predmetnom periodu imali veću plaću i naknade a bez beneficiranog staža i obratno, što je i logično. Stoga bi u tom smislu trebalo prihvatiti prijedlog autentičnog tumačenja koji je dostavio sekretar Komisije.

Branko Zrno je, nakon rasprave, zaključio da Komisija ima stav o traženom autentičnom tumačenju, kako je to istakao i Šefik Džaferović. Predložio je da se prihvati navedeni prijedlog ovog autentičnog tumačenja i kao takav, u skladu s poslovničkim odredbama oba doma PSBiH, prosljedi ustavnopravnim komisijama Predstavničkog i Doma naroda.

Komisija je jednoglasno, sa osam glasova „za“, usvojila ovaj prijedlog autentičnog tumačenja člana 185. stav 1. Zakona o službi u Oružanim snagama BiH i prosljedila ga u daljnju proceduru.

Ad. 7. Informacija o izdatim dozvolama za promet oružja, vojne opreme i proizvoda dvojne namjene (podnosilac: Ministarstvo vanjske trgovine i ekonomskih odnosa BiH)

Branko Zrno dao je uvodne napomene o ovoj informaciji.

Komisija je, bez rasprave, jednoglasno, sa osam glasova „za“, primila k znanju Informaciju o izdatim dozvolama za promet oružja, vojne opreme i proizvoda dvojne namjene.

Ad. 8. Tekuća pitanja

- a. Poziv PSOTC-a za učešće na regionalnom seminaru o upravljanju kriznim situacijama, od 7. do 10. 10. 2008., Ilidža**

Komisija je odlučila da Seminaru PSOTC-a prisustvuju Adem Huskić i Željko Grubešić.

- b. Informacija o sastanku članova Zajedničke komisije s komandantom EUFOR-a u BiH general-majorom Martinom Villalainom, 23. 6. 2008.**

Zajednička komisija primila je k znanju Informaciju o sastanku s komandantom EUFOR-a u BiH general-majorom Martinom Villalainom, 23. 6. 2008.

- c. Informacija o sastanku s predstavnicima Antikorupcionog tima NATO-a, 2. 7. 2008.**

Zajednička komisija primila je k znanju Informaciju o sastanku s predstavnicima Antikorupcionog tima NATO-a, koji su predstavnici Zajedničke komisije za odbranu i sigurnost održali 2. 7. 2008.

d. Informacija o sastanku NATO koordinacionog tima Vijeća ministara BiH, 8. 7. 2008.

Zajednička komisija primila je k znanju Informaciju o sastanku NATO koordinacionog tima Vijeća ministara BiH, održanog 8. 7. 2008.

e. Informacija o posjeti članova Zajedničke komisije za odbranu i sigurnost BiH Iraku

Hazim Rančić kao podnosilac informacije ukratko je obrazložio njenu suštinu. Naveo je da je bilo određenih propusta u organizaciji puta u Irak, te sugerirao da bi bilo dobro da Komisija ima precizne informacije nakon svakog ovakvog puta. Osvrnuo se na diskusiju Dušanke Majkić u okviru 4. tačke dnevnog reda, te naglasio da apsolutne sigurnosti nema nigdje na svijetu, a naročito ne u Iraku. Naglasio je da je ovo već sedma rotacija unutar OSBiH u operacijama podrške miru, te da od 36 vojnika, koji se trenutno nalaze u Iraku, njih čak 32 je po dva ili više puta bilo tamo. Pohvalio je našu jedinicu u Iraku, te naveo da je njihov zadatak uništavanje neeksploziviranih ubojitih sredstava nakon što im neka druga jedinica najavi gdje se ona tačno nalaze. Jedinica s ponosom izvršava svoju misiju i niko nema primjedbe na njihov rad. Pripadnici jedinice nemaju primjedbi na hranu i uslove rada. Veoma su složni i veliko je međusobno poštovanje između njih, naglašavajući da je ono bolje nego između predstavnika pojedinih institucija u BiH.

Branko Zrno zahvalio se Rančiću na podnesenoj informaciji, navodeći da samo ne treba organizaciju puta u Irak dovoditi u vezu sa Zajedničkom komisijom za odbranu i sigurnost BiH.

f. Prijedlog predstavnika Zajedničke komisije za radnu posjetu Češkoj

Branko Zrno zamolio je prisutne da predlože četiri člana koji bi, zajedno sa sekretarom i savjetnikom Komisije, u oktobru ili novembru, posjetili sigurnosne i odbrambene institucije u Češkoj Republici. Komisija je za ovaj put predložila: Branka Zrnu, kao predsjedavajućeg Komisije, Šefika Džaferovića, prvog zamjenika, te Vinka Zorića i Dragu Kalabića, članove, te Dragicu Hinić i Željka Grubešića. O tačnom datumu ove posjete Komisija će biti blagovremeno obaviještena.

g. Poziv od George Marshall Centra za učešće na seminaru NATO-a „Strategijske i operative perspektive“, koji će biti održan u Sarajevu, 17. i 18. 9. 2008.

Branko Zrno informirao je prisutne da je u međuvremenu stigao poziv od George Marshall Centra za učešće na seminaru NATO-a „Strategijske i operative perspektive“, koji će biti održan u Sarajevu 17. i 18. 9. 2008., te zamolio članove Komisije da predlože svoje predstavnike koji bi mu prisustvovali. Komisija je odlučila da ovom seminaru prisustvuju: Branko Zrno, Vinko Zorić i Dragica Hinić.

Na kraju, Zrno je napomenuo članove Komisije da će sutra, 25. 7. 2008., s početkom u 10 sati, biti održan sastanak sa zamjenikom predsjedavajućeg Vojnog komiteta NATO-a general-pukovnikom K. W. Eikenberryem, te zamolio članove Komisije da mu prisustvuju.

Ovim je, u 13,45 sati, realiziran dnevni red drugog nastavka 24. sjednice, a njen nastavak zakazan za 29. 7. 2008. sa početkom u 9,45.

Drugom nastavku sjednice, 29.7.2008., prisustvovali su članovi Zajedničke komisije: Branko Zrno, Šefik Džaferović, Slobodan Šaraba, Jozo Križanović, Hazim Rančić, Dušanka Majkić, Drago Kalabić, Vinko Zorić i Adem Huskić.

Odsustvo s drugog dijela sjednice opravdali su: Mirko Okolić i Sulejman Tihić. Ivo Miro Jović zakasnio je na sjednicu zbog problema u prometu, te je u Parlament došao deset minuta po okončanju sjednice.

Sjednici su prisustvovali i gosti, kao i predstavnici Sekretarijata Parlamentarne skupštine BiH:

- Selmo Cikotić, ministar odbrane BiH,
- Željko Knez, Predsjedništvo BiH,
- Zoran Jovanović, Vijeće ministara BiH,
- Muhamed Smajić, Ministarstvo odbrane BiH,
- Christian Haupt, Misija OSCE-a u BiH,
- Dijana Šatara, OHR,
- Vesna Willis, EUPM,
- Mirsad Žiga i Marc Fleming, Ambasada SAD-a,
- Dragica Hinić, sekretar, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**. Naglasio je da je Zajednička komisija na posljednjoj sjednici, 24.7. 2008., donijela zaključak da se odgodi izjašnjavanje o Odluci Predsjedništva BiH o učešću jedinice Oružanih snaga BiH u operaciji podrške miru „Iračka sloboda“ u Iraku. Naveo je da za trajanje današnjeg nastavka sjednice vrijeme ograničeno s obzirom na održavanje sjednice Predstavničkog doma, koja je zakazana u 10 sati, te zamolio članove Komisije da ne vode predugu raspravu o ovoj tački, naglašavajući da je to već urađeno.

Slobodan Šaraba uvažio je stav Branka Zrne, ali naveo da želi iznijeti svoje mišljenje, s obzirom da nije prisustvovao posljednjem nastavku sjednice kada je u raspravi pomenuto i njegovo ime. Istakao je da se protivi Odluci Predsjedništva BiH i rekao da postoje tri razloga zbog kojih OSBiH ne treba da učestvuju u ovoj operaciji. Kao prvi razlog naveo je da je Irak ratno područje, gdje se vodi pravi rat i gdje mirovna misija gubi svoj karakter. Drugi razlog je čisto humanitarne prirode jer se tamo radi na temperaturama preko 50 °C i posao u tim uslovima je potpuno nehuman za vojnike iz BiH. I kao posljednji naveo je svoj lični razlog, istaknuvši da tamo gdje ne bi poslao svoje dijete, ne bi poslao nijedno drugo dijete iz BiH. To su tri razloga zbog kojih ne želi poslati grupu mladih ljudi na tako opasan zadatak.

Kako nije bilo više prijavljenih za raspravu, Zrno je na glasanje dao Odluku Predsjedništva BiH.

Sa sedam glasova „za“, jednim „protiv“ i jednim „suzdržanim“, Komisija je potvrdila Odluku Predsjedništva BiH o učešću jedinice Oružanih snaga BiH u operaciji podrške miru „Iračka sloboda“ u Iraku.

Zapisnik sačinila
Dragica Hinić

Predsjedavajući
Zajedničke komisije
Branko Zrno